

Naalakkersuisut inuit tarnimikkut nappaatillit amerlanerit aamma ajuutillit ilinniakkaminnik aallarteriikkaminnik naammassinninnissaannut suliniuteqarnissaannik peqquneqassasut Inatsisartut aalajangigassaannik siunnersuut. Tamanna ilaatigut pisinnaavoq inuit peqannginnerusinnaanerit periarfissiissutigalugu aamma ilinniarnep sivilissusia akuereriikkamit sivitsorlugu.

(Inatsisartuni ilaasortaq, Paneeraq Olsen, Naleraq)

Akissuteqaat

(Ilinniartitaanermit, Kultureqarnermit, Timersornermit Ilageeqarnermullu Naalakkersuisoq)

Aappassaaneerinnineq

Kultureqarnermit, Ilinniartitaanermit, Timersornermit Ilageeqarnermullu Ataatsimiititaliaq Naalakkersuisut sinnerlugit qutsavigaara siunnersuummik peqqissaartumik suliaqarnerannik isumaliutissiissutaannillu. Iuarisimaarlugu maluginiarparput ataatsimiititaliap siunnersuut akuersissutigisassatut inassutigigaa.

Ataatsimiititaliap Naalakkersuisut kaammattorpaat nassuiaateqarfigineqassasoq nunamut tamarmut atuuttussamik ilinniartitaanermit, ilinniaqqittarnernut pikkorissartitsisarnernullu periusissiamik iliuusissanullu pilersaarummik innarluutilinnut suliaqarfimmut atatillugu suliaqarneq sumut killissimanersoq pillugu nassuiaateqassasut. Soorlu immikkut tamanna pillugu ataatsimiititaliamut allakkatigut qanittukut ilisimatinneqartut, iliuusissanut pilersaaruserneq innarluutilinnut suliaqarfimmi sulisuusut ilinniartitaasernerat, ilinniaqqittarnerat pikkorissartinneqartarnerallu pillugit iliuusissanut pilersaarusiaq ajoraluartumik naammassiniarneqarnermini kinguartoorunneqarpoq, nunat tamalaat akornanni FN-imi innarluutilinnut isumaqatigiisummi aalajangersakkat annertuut iliuusissanut pilersaarummut ilanngunniarneqarnerat eqqarsaatigalugu.

Ataatsimiititaliap tulliullugu kaammattuutigaa isumaliutigineqaqqullugu siunnersuutip piviusunngortinneqarneranut atatillugu paasissutissanik ilanngussisoqassanersoq kiisalu sullitassatut siunnerfiusut atatillugu fagitigut sullissisuusartut ilinniaqqittassanersut. Naalakkersuisut kaammattuutaasoq taanna suliat ingerlateqqinneqarneranni ilanngutissavaat. Naalakkersuisut ilutigisaanik isumaliutigiumavaat naleqquttuussanersoq sullitassatut siunnerfiusut taakkua nassuiaasiornermi immikkut aallunneqassanersut, ilinniartitaanerni, ilinniaqqittarnerni pikkorissartitsisarnernilu innarluutilinnut suliaqarfimmi sulisuusut eqqarsaatigalugit.

Ataatsimiititaliap ilanngullugu aamma kaammattuutigaattaq siunnersuummik piviusunngortitsinermi kiisalu iliuusissanut pilersaarummik suliaqarnermi ilaatinneqassasoq qanoq qularnaarneqassanersoq inuit tarnimikkut innarluuteqartut eqqortumik naleqquttumillu tapersorneqarlutillu ikiorneqartarnissaat psykiatriimi, aammalu Peqqinnissaqarfimmi psykiatriimik ineriartortitsinermut pilersaarutini eqqumaffigineqassasoq ataqatigiissaarisqaarnissaa ingerlatsiviit assigiinngitsut akimorlugit, psykiatriimi aamma ilinniartitaanernik ingerlatsivinni. Naalakkersuisut tamanna eqqumaffiginiaapaat.

Kiisalu ataatsimiititaliap ataatsimut isigisumik Naalakkersuisut kaammattorpaat suliat ingerlateqqinneqarneranni peqataatitseqqullugit peqatigiiffinnik kattuffinnillu suliani susassaqartunik siunnersuutip piviusunngortinneqarneranut atatillugu. Naalakkersuisut soorunami taamaaliorumapput.

Taamatut oqaaseqarluta siunnersuut akuersissutigineqartussatut innersuupparput.